

26 November. 2025

समे .18:15 Hrs

<><><><><><>

### Headlines

- उपराज्यपाल मनोज सिन्हा होरें जम्मू च संविधान दिवस सरबन्धी कार्यक्रमें दी अगुवाई कीती, लोकें गी संवैधानिक मूल्लें-कदरें दा अनुसरण करने दा आह्वान कीता।
- मुख्मन्त्री उमर अब्दुल्ला होरें आखेआ ऐ जे शिक्षा गी समावेशी ते धार्मिक फर्को-फर्की कोला मुक्त होना लोडचदा ऐ।
- पंज ब'रे दे वक्फे दे बाद जम्मू-कश्मीर थमां 4 सांसद राज्यसभा च प्रतिनिधित्व करा'रदे न। औंदी पैहली दिसंबर गी उपराश्ट्रपति होर एन.सी दे त्रै सांसदें गी संगंध चकाडन।
- मुख्म सचिव होरें पी.एम गति शक्ति पोर्टल पर केंद्र शासित प्रदेश दे पहले डिजिटल जिमी बैंक दी शुरूआत कीती।
- जम्मू-कश्मीर च सीत लैहर बल्लें-बल्लें जोर फगड़ा करदी ऐ, औने आहले दिनें च तापमान होर चिगड़े जाने ते धुंध पौने दे असारा।

<><><><><><>

### LG-Const. Day

उपराज्यपाल मनोज सिन्हा होरें अज्ज जम्मू च “संविधान दिवस” दे सिलसिले च आयोजित कार्यक्रम च भारती संविधान दे पितामाह ते रचेयता खोआने आहलें गी श्रद्धांजलि भेंट कीती। इस मौके उनें आखेआ जे पिछले 76एं ब'रें थमां स्थाड़ा संविधान हर कुसै लेई समाजी बरोबरी, सुतंत्रता ते समाजी न्याऽ दी बत्त दस्सने आहली रोशनी दे रूपै च स्थाड़ा मार्गदर्शन करदा आवा'रदा ऐ। किट्टै गी संबोधत करदे होई एल.जी होरें आखेआ जे 1949 च भारत नै अपना संविधान स्वीकार कीता हा। उनें सभनें लोकें गी आखेआ जे हर भारती गी इस गल्लै दा ध्यान रखना लोडचदा जे उं'दा हर कम्म, कार्रवाई ते हरकत संविधान दे दायरे अंदर गै होनी लोडचदी।

अज्ज संविधान दिवस दे मौके पर समूलचे जम्मू प्रांतै च केई चाल्ली दे आयोजन कीते गए जिंदे च लोकें संविधान दी पालमा दी संगंध चुक्की। एहदी प्रस्तावना गी किट्टे रलिए इक संगंध दे रूपै च पढ़ेआ ते “रन फॉर युनिटी” द्रौड़ च बी हिस्सा लैता। इस बारै पेश ऐ इक विशेष रिपोर्ट।

<><><><><><>

## CM-Poonch

मुख्यमंत्री उमर अब्दुल्ला होरें जोर देइयै आखेआ जे शिक्षा गी समावेशी होने दे कन्नोकन्नी धार्मिक फर्कोफर्की ते पक्खपात कोला मुक्त होना लोडचदा। एहू गल्ल मुख्यमंत्री होरें अज्ज पुंछ च जिया उल उलूम ग्रुप ऑफ एजुकेशन दे 50में सलाना समारोह गी संबोधित करदे होई आक्खी। धर्म निर्पक्ख ते सामी शिखा दे महत्व गी उजागर करदे होई उनें आखेआ जे हर तालीमी इदारे गी सभनें विद्यार्थियों गी विजन कुसै फर्कोफर्की दे मौके उपलब्ध कराने लोडचदे। उनें आखेआ जे इस चाल्ली दा रौंऽ इखतयार करने कन्नै समाजी बरोबरी, सद्भाव, युवाएं दा सशक्तिकरण ते इक उन्नत समाज दा निर्माण यकीनी बनदा ऐ। उमर अब्दुल्ला होरें आखेआ

<><><><><><>

## LG- 26/11

उपराज्यपाल मनोज सिन्हा होरें 26/11 दे मुम्बई आतंकी हमले च शहीद होए दे सभनें लोके गी अज्ज श्रद्धांलि भेंट कीती ऐ। सोशल मीडिया पर इक पोस्ट च उपराज्यपाल होरें आखेया जे मुख्य म्हेशां उनें बहादुर सुरक्षाकर्मियों दा आभारी रौहग- जिनें देसै दी संप्रभुता ते अखंडता लेई बहादुरी कन्नै लड़ाई लड़ी ते सर्वोच्च बलिदान दिता। सिन्हा होरें उन्दी दलेरी ते निस्वार्थ भावना गी चेता करदे होई इस गल्लै पर जोर दिता जे उन्दी विरासत पीढ़ियें गी प्रेरित करदी रौहग ते आतंकवाद खलाफ मुख्य दे संकल्प गी होर मजबूत करोग।

<><><><><><>

## RS Oath NC

जम्मू-कश्मीर थमां नमें चनोए दे त्रै सांसद औंदी पैहली दिसंबर गी राज्यसभा च ओहदे ते राजदारी दी सगंध चुक्कडन। उसै रोज संसद दा स्याले आहला इजलास बी शुरू होआ करदा ऐ। इनें त्रऊं सांसदे च शम्मी आंबराय, सज्जाद अहमद किचलू ते चौधरी मोहम्मद रमजान शामिल न, जिनेंगी उपराष्ट्रपति ते राज्यसभा दे चेयरमैन सी.पी राधाकृष्णन सगंध चुकाडन। राज्यसभा दे इनें चुनाएं च त्रै सीटां नेशनल कांफ्रेंस नै जित्तियां हियां जिसलै जे बीजेपी गी छड़ी इक्के सीट पर जित्त हासल होई ही। बीजेपी दे सांसद सत शर्मा होर पैहले गै एहू सगंध चुक्की चुके दे न।

<><><><><><>

## CS Digital

मुख्य सचिव अटल डुल्लु होरें पी.एम गति शक्ति पोर्टल उप्पर केन्द्र शासत प्रदेश दा पैहला डिजिटल Land Bank दा शुभारम्भ कीता। एहू पैहला जंगलात ते वित्त विभागे आसेया भार-मुक्त यानि कोई कनूनी रुकावट-नीजि दावा या होर दुई रुकावट नेई होयै दे रुप च विकसित होआ ऐ। इस पैहल राएं बक्ख-बक्ख जीमी दे नक्शे तयार कीते जंदे न जेहदे राएं विकास परियोजनाएं दी पंछान कीती जाई सकै। 17 जिले च 462 पारसलें ते 24 सौ हैक्टर शा मते क्षेत्र गी कवर करदे होई इस Land Bank दा उद्देश्य बुनियादी ढांचे दी योजना गी व्यवस्थित

करना ते जमीन उप्पर नजैज कब्जे गी रोकना ऐ। मुख सचिव होरें जिला प्रशासन गी पार्सलें दी नियमत निगरानी ते इस प्लेटफार्म दा प्रभावी ढंगा कन्नै इस्तमाल करने दा आग्रह कीता। समारोह च सीनियर अधिकारियें ते DCएं वीडियो कांफ्रेंसिंग राएं हिस्सा लैता।

<><><><><><>

### JK –Govt. Awards

जम्मू-कश्मीर सरकारै 2026 दे स्टेट अवार्ड- जेहड़े गणतंत्र दिवस दे मौके पर दिते जाने न- लेई नामजदगियां मंगियां न। आम प्रशासनिक विभाग आसेया इस बरे जारी इक अधिसूचना मुजब एह अवार्ड ब्हादुरी- साहित्य- कला- कारीगिरी- समाज –सुधार- सार्वजनिक सेवा- लाइफ टाईम एचीवमैन्ट- खेडु- मीडिया- पर्यावरण- उद्योगिक उद्यमता दे क्षेत्र च दिते जाने न। इंदे लेई नामजदगियां समाजी ते खेडु संगठन- गैर-सरकारी संगठन- युनिवर्सिटियां- प्रशासनिक सचिव ते जम्मू-कश्मीर कला संस्कृति ते भाषा अकादमी आसेया भेजियां जाई सकदियां न। एहदे लेई खीरी तरीक 15 दिसम्बर 2025 रखी गेदी ऐ।

<><><><><><>

### Aadhar-Update

विशिष्ट पंछान सरबन्धी भारती प्राधिकरण समग्र शिक्षा निदेशालय कन्नै रलिए रामबन जिले च स्कूली बच्चें आस्तै आधार बायोमीट्रिक अपडेट मुहिम बड्डे पैमाने पर शुरू कीती गई ऐ। सरकारी ते निजी स्कूलें च कैंप लोआए जा'रदे न जिंदे च 5 ब'रे तगर ते 15 थमां 17 ब'रे तगर दे बच्चें दा जरूरी आधार अपडेट कीता जा'रदा ऐ। इस पहल कन्नै अभिभावकें ते स्कूली अमले गी समेंसिर आधार अपडेट करने दी महत्वता बारै जानकार बनाया जा'रदा ऐ। सरकारी स्कीमें दे लाह हासल करने आस्तै अपडेटिड आधार सरबन्धी जानकारी जरूरी ऐ जियां वजीफा, प्रवेश परीक्षा, डाइट, रामबन थमां शहनवाज गनी होरें जानकारी दिंदे होई आखेआ

<><><><><><>

### Farmer Reasi

रियासी जिले दे करसान राश्ट्री राई-बाई पर राश्ट्री मिशन हेठ खरा-मता माली लाहू ठोआंदे न, जेदे च के.वी.के रियासी तरफा लगातार प्रशिक्षण दी सहूलत दिती जा'रदी ऐ। पर्यावरण दे अनुकूल ते रयासन रैहत नीतिएं करिए एहू करसान उच्च गुणवत्ता दी जैविक सब्जियां उगा'रदे न जिंदी बजार च जबरदस्त मंग ऐ। पौनी दे कृष्ण सिंह होरें अपनी सफलता दी कहानी सांझा करदे होई दस्सेआ जे हर दिन 70 थमां 80 किलो जैविक सब्जिएं दी पैदावार कन्नै उ'नेंगी लक्खें दी कमाई होआ'रदी ऐ। कृष्ण सिंह होरें एहू बी दस्सेआ जे

<><><><><><>

### Weather

जम्मू-कश्मीर च ठण्ड बदी गई ऐ। ज्यादातर जिलें च तापमान तेजी कन्नै घटेआ ऐ ते किश थाहरें मौसम दी सभनें शा ठण्डी रात बी दर्ज कीती गई। आकाशवाणी जम्मू संवाददाता नै जानकारी दित्ती ऐ जे जम्मू शहर दा तापमान 8.8 डिग्री सेल्यिस, बनिहाल च 0.7 डिग्री सेल्यिस ते भद्रवाह च 0.5 डिग्री सेल्यिस दर्ज कीता गेआ। मौसम विभाग केंद्र श्रीनगर नै चेतावनी जारी कीती ऐ जे कश्मीर संभाग दी मती सारी थाहें ते जम्मू संभाग दी किश थाहरें च हल्की थमां दरम्यानी धुंध पेई सकदी ऐ। अगले 7 दिनें च तापमान च 1 थमां 2 डिग्री सैल्यिस दी होर गिरावट आने दी मेद ऐ जेदे कन्नै बड्डलै बेल्ले ठण्ड बदने दी पेशनगोई बी कीती गई ऐ।

<><><><><><>